

*Benny Nisbet*

# AVP KIER STROBA E PROCESO CU GOBIERNO TA HAYA TERENONAN DI EXXON

ORANJESTAD(AAN) -- Parlamentario Benny Nisbet di PPA a indica cu fraccion di AVP a bandona e reunion cu comision central cu e meta pa stroba e proceso cu Gobierno di Aruba a inicia pa por haya un acuerdo final cu Exxon y door di esey haya back e terenonan na San Nicolas cu ainda ta den man di Exxon.

PPA ta lamenta esaki pa varios motibo den cual cu awor aki ta bisto cu Aruba no a logra saca nada di e proceso cu a worde hiba den pasado pa cu e claim ambiental, e claim di belasting cu tanto tabata worde discuti.

Segun Nisbet, loke pueblo di Aruba a logra ta bao di gobernacion actual ora cu e gobernacion di MEP/ADN y PPA a demostra cu ta posible pa logra e reapertura di e refineria.

E ta haya cu ta bisto cu pasobra ta aña di eleccion

fraccion di AVP mester busca argumentonan fofu pa bende e pueblo Arubano y ayera den comision central lider di AVP a escoge cu ta interes nacional pa e hunga politica partidista lamentablemente.

Nisbet a señala cu e rapport di Grondmij traha na 1986 ta bisa cu mester bin un otro rapport pa cuantifica e cifranan si acaso kier bay riba cuestion di un claim ambiental. Esaki nunca a worde traha pa Gobierno di AVP cu tabata tey te Februari 1992.

Gobierno di AVP a bay di acuerdo cu e condicionnan di Exxon pa tuma e tereno back pa construccion di prison a base di e principio "as is where is" expresa den carta di Promer Ministro di e tempo ey Eman pa Lago fecha 9 Juli 1987.

El a sigui bisa cu Gobierno di AVP y independentenan a firma un contract cu Exxon

sin aprobacion di Parlamento den cual contract a tuma back di Exxon e parti di tereno cu tabata esun di mas sushi, esta e proces area cual a worde firma y pasa den e asina yama dismanteling agreement fecha 29 di Januari 1988 firma pa 7 Ministro di Gabinete Eman, tambe a base di e principio di "as is, where is".

Nisbet ta haya cu tur e decision aki di Gabinete Eman, a kita e base di mas grandi di un eventual claim ambiental pa Aruba, cual claim normalmente lo a dura bastante aña promer cu yega na un decision pa colmo.

Segun Nisbet, Gabinete Oduber forma pa MEP/ADN y PPA un otro pida tereno grandi a pasa pa Gobierno a base di "as is, where is", pero e biaha aki, locual pueblo a haya hunto cune ta e reapertura di e refineria di Aruba cual AVP a bisa cu nunca lo por.

Nisbet a indica cu algun aña Gobierno di Aruba tabata pretende cu Aruba lo tin un claim ariba Exxon (Lago) pa sumanan di belasting cu no a worde paga den pasado.

Juez a pone un punto final tras di e pensamiento aki, dunando un veredicto cu esaki no ta cuadra cu berdad pero de contrario Aruba debe Exxon 50 Miyon Florin.

Segun Nisbet, Gabinete Oduber a dicidi di yega na un acuerdo final. Pakico???

1. Un final entre Exxon y Gobierno lo significa entre otro un energia cu ta worde gasta na e asuntonan aki, por worde dirigi na asunto di gobernacion cu merece mas atencion y cu ta duna fruta real tambe.

2. Pueblo di Aruba tin e deseo pa hopi tempo pa e terenonan y beachnan envolvi regresa den man di Gobierno.

3. Pueblo di San Nicolas tin

e deseo pa e beachnan: Grapefield, Boca Grandi, Baby Beach, Rogers Beach y mucho otro regresa den man di pueblo pa pueblo por usa nan pero tambe pa desaroyo turistico di e areanan aki.

4. Seroe Colorado ta un pida di Aruba cu tin un infraestructura prepara caba y si ta necesario hasta por worde facilmente mehora, cu meta di yuda den e tantisimo problema cu e pueblo y Gobierno tin pa atende e problematica di casnan y infraestructura.

Nisbet su conclusion ta cu e maneho di Gobierno ta logico, comprensible y mas ainda na su lugar mirando e diferente aspectonan cu a trece padilanti. PPA ta lamenta cu AVP despues di a hiba un maneho pa stroba e reapertura di e refineria awor kier stroba e deseo di pueblo pa haya terenonan bek y desaroya nan segun deseo di pueblo.